

Noticia
Transparente
di Gobierno

ISLA ONLINE

Diamars 17 September 2024

Email: IslaOnline@gobierno.aw Tel: 528-4952



ARTE DI MURAYA
SAN NICOLAS



**STABILIDAD
Y
PROSPERIDAD**
2 0 2 4



Gabinete Wever-Croes



PROME MINISTER

Evelyn Wever-Croes

DEPARTAMENTO DI DISEÑO Y PLANIFICACION DI DOW TA ATENDIENDO CU 47 PROYECTO PAREU

**Considerando e proyectonan aki ta cay bou 'asuntonan coriente',
lo continua cu esakinan**

Prome Minister Evelyn Wever-Croes, durante e Conferencia di Prensa di Gobierno di Aruba dialuna ultimo a elabora riba varios proyecto cu DOW ta ehecutando na e momentonan aki, poniendo luz riba e continuacion di esakinan awor cu Gobierno ta demisionario.

En general ta trata di proyectonan andando cu ya tin fondo aloca den presupuesto y ya a cuminsa e proceso di destaho. Esakinan ta cay bou 'asuntonan coriente' of 'lopende zaken' y por sigui sin ningun problema. Na e momento aki e departamento di diseño y planificacion di DOW ta atendiendo cu 47 proyecto pareu. Por ehempel:

Caminda High Rise Hotel

Fase 1 die proyecto di e caminda na high rise hotels lo keda cla pa fin di 2024 y ta birando e joya di e caretera cu e mester ta den e centro di e area turistico.

Embeyecemento Eagle Beach

E proyecto di embeyecemento di Eagle beach fase 2, cu ta un proyecto di Minister di Turismo, Dangui Oduber, ta bayendo den bon direccion y lo continua te e fase final.

Renobacion di e edificio di Parlamento

Esaki ta un proyecto importante di ex-Presidente di Parlamento Edgard Vrolijk cu a traha hopi duro riba dj'e. E Proyecto aki ta canando bon y e ehecucion ta sigui manera a wordo palabra. Danki na tur su esfuerso Aruba lo bay mira e remodelacion di edificio di Parlamento wordo completa.

Mas proyecto den pipeline:

Juliana School na Paradera
Rotonde plaza Cas di Cultura
Boardwalk Malmok fase 3
Embeyecemento Wilhelminastraat
Embeyecemento Kas Ariba na e anker
Revitalisacion Centro di San Nicolas Arubus-Setar
Embeyecemento Sint Maartenstraat



Edificio DIMAS y DAO

Embeyecemento Rodger's Beach

Memorial Sero Colorado

Embeyecemento Misa Santa Teresita na San Nicolas

Mon Plaisir School fase 2

Post Brandweer AAA

Embeyecemento Kapel Alto Vista

"Esakinan ta un par di e proyectonan cu DOW ta trahando riba nan pareu. Proyectonan cu te awor nos ta kere cu por wordo ehecuta ainda. Manera mi a bisa na oportunidadnan anterior, varios di e proyectonan aki a sufri retraso no door di DOW pero mas bien door di e situacion di e mercado di construccion aki na Aruba unda nos contratistanan ta ocupa cu hopi otro proyecto. Unabes cu e 3 proyectonan grandi di hotel finalisa fin di 2024 y comienso di 2025 lo tin mas espacio riba mercado y eyan nos ta conta cu e contratistanan lo inscribi den e destahonan publico di e proyectonan di DOW pa asina por ehecuta nan", Prome Minister a expresa.

Prome Minister Evelyn Wever-Croes: FADA a presenta resultado di estudionan riba "vaping" na Aruba

GOBIERNO TA SOSTENE E INICIATIVA DI FADA PA CONSCIENTISA COMUNIDAD RIBA E PELIGER DI VAPING



Dialuna mainta 16 di september Prome Minister Evelyn Wever-Croes hunto cu Ministernan Rocco Tjon, Dangui Oduber y Endy Croes a reuni cu Fundacion Anti Droga Aruba (FADA). FADA ta un organisacion no-gubernamental cu ta existi pa 40 aña caba cu e meta di informa y conscientisa pueblo di Aruba y sigur e hobennan tocante e problemanan cu uzo y abuso di droga y alcohol ta trece cu ne.

Durante e mainta aki representantenan di FADA a trece dilanti e preocupacion cu nan tin pa cu vaping na Aruba. Esaki awendia ta un "trend" cu ta andando entre adultonan y hobennan pero mas preocupante ta cu edad entre e hobennan ta hopi jong, cuminsando na 7 aña. Na Aruba hopi hende no conoce ainda e riesgonan di salud cu ta bin cu vaping y esaki ta e enfoke y e meta di FADA, pa conscientisa e comunidad.

Vaping ta un manera di humamento pero na un manera mas moderno sin cu ta saca huma manera un sigaria. Pa e motibo aki tin e creencia cu vaping ta menos dañino cu sigaria cual no ta cuadra cu berdad. Tin hende ta haci'e como un trend uando diferente aroma y azetanan esencial cu ta hole y por smaak dushi. Esaki tin varios consecuencia negativo riba salud di un persona. Ta trata di problemanan di pulmon principalmente, pero tambe otro problemanan grave di salud. Y sigur den caso di muchanan cu ya na un edad jong ta haci vaping esaki ta mas grave ya cu ainda nan pulmonnan no ta asina fuerte ni desaroya ainda.

"FADA a presenta na nos e resultado di nan estudio y con nan kier conscientisa comunidad y Gobierno di Aruba ta sostene e iniciativa di FADA totalmente y ta spera cu pronto e por wordo concretisa. Na fin di dia un adulto ta responsabel pa su actonan



y di e consecuencianan, pero un mucha no y p'esey ta tarea di e adulto pa duna ehempel y protege nos muchanan. Nos niun kier pa na grandi nos muchanan por tin problemanan di pulmon y otro problemanan di salud. Den nomber di Gobierno di Aruba mi ta gradici FADA pa nan aporte na e comunidad di Aruba durante tur e añanan cu campananan di conscientisacion", Prome Minister a expresa. ■■■



MINISTER MADURO TA FELICITA SR. STUART WILLEMS PA SU 30 ANIVERSARIO TRAHANDO NA BIENESTAR DI COMUNIDAD

E siman aki Minister Maduro di Finansa a ricibi sr. Stuart Willems y señora hunto cu su coleganan di Centraal Accountantsdient (CAD) pa asina felicita y gradici Stuart pa su 30 aniversario trahando na bienestar di comunidad.

Pa e ocasion festivo aki Minister Maduro a entrega na Stuart su decreto gubernamental correspondiente y tambe un regalo pa recorda e aniversario importante aki di trabou.

Minister Maduro ta gradici Stuart kende a traha hopi aña na DIA y awo na CAD den e ramo di IT cu hopi dedicacion y profesionalismo. ■■■





106 DETENIDO NA KIA A RICIBI NAN CERTIFICADO EXITOSAMENTE



Recientemente, a tuma luga e entrega di certificado na detencionan na KIA brinda pa Fundacion Enseñansa pa Aruba (FEPA). 106 detenido a obtene nan certificado pa diferente curso, pa asina nan por yega na un trabou, unbes nan sali for di KIA.

Segun minister di Husticia y Asuntonan Social sr. Rocco Tjon, pa un detenido por re-integra y re-socialisa na un manera exitoso, como pais mester inverti den nan, e ta un rekisito riba cual como pais nos ta wordo audita, door di entre otro CPT.

Pa e motibo aki a traha un plan integral pa haya sa kico ta e cursonan y opleiding cu nos por ofrece na e detencionan, teniendo na cuenta cu nan propio nivel di opleiding y nan interes, pa di e forma ey na momento cu nan sali for di KIA nan tin un papel den nan man cu por duna nan un oportunidad di trabou.

E mandatario a indica cu e ta satisfecho cu siman pasa a entrega 106 certificado na diferente detenido, cu a sigui diferente curso manera, small business, basiskennis calculatie



en boekhouden, manicure pedicure, conga lessen basico y avansa, sales and marketing y horticultura basico. Di e forma aki nos por yuda nan cu un segundo oportunidad unbes nan sali for di KIA.

Por ultimo, a gradici Fundacion Enseñansa pa Aruba (FEPA), kende a brinda e diferente cursonan aki na nos detencionan na KIA. ■■■



MINISTER ENDY CROES TA FELICITA E HUNGADONAN CU A DESTACA DURANTE E CAMPEONATO 2023 -2024 DI FUTOL

Cu deseo, dedicacion, determinacion y disciplina boso a logra!



Den un anochi di gala diasabra ultimo, a tuma luga e trecer (3) edicion di AVB Award Night organisa pa Arubaanse Voetbal Bond (AVB). Durante e magno evento a premia e hungadonan femenino y masculino di tur categoria cu a destaca durante e campeonato 2023 – 2024 di futbol. Durante cada wega e coach di cada team ta score e hungado di e team contrario. Un cantidad di hoben acompaña pa nan mayornan tabata presente na e ocasion special aki.

Tambe, AVB a reconoce dos referee cu a sobresali den e temporada 2023 - 2024. Minister Endy Croes acompaña pa su kerida esposa Sra. Dilailah Croes – Odor a acudi na e ceremonia aki. E anochi a inicia cu himno di Aruba interpreta pa e talentoso Edjean Semeleer. Sigui pa discurso di presidente di AVB Sr. Randolph Lacle y Minister Endy Croes. Den nomber di Gobierno di Aruba, Minister di Deporte a felicita e hobennan cu e logro aki. Cu deseo, dedicacion, determinacion y disciplina boso a logra!



MINISTER ENDY CROES A REUNI CU DOW UNDA A TRATA "NORMBEDRAG"



Recientemente, Minister Endy Croes a reuni cu director Sr. Marlon Croes y staf di DOW, unda cu a trata "normbedrag". Manera ta conoci, despues di 13 aña Minister di Enseñansa y Deporte cu aprobacion di Parlamento di Aruba a aumenta e "normbedrag" cu 6.4 milyon florin pa tur 10 directiva di scol. E "normbedrag" ta ancla den ley y ta e compensacion cu "schoolbesturen" ta ricibi a traves di "exploitatie subsidie".

E "normbedrag" ta cubri costo di, entre otro mantencion di scol, mantencion di e mueblenan di scol, seguro di e edificio di scol y lokaal, limpieza di edificio y lokaal, coriente, awa, gas, airco, inversion den "hulpmiddel" y e necesidadnan di scol, lesmateriaal y administracion. Durante e proceso DOW a hunga un rol hopi importante comokiera cu nan a bishita tur scol, unda cu a midi, entre otro lokaal, baño, gymzaal, computer lokaal y koffie kamer. E "normbedrag" ta pa klas, gymzaal of "practijk lokaal", depende di e tipo di lokaal y grandura e scolnan ta ricibi un suma a traves di "exploitatie subsidie". Pa actualisa tur klas lokaal y diferente localidad cu e scolnan tin ta defini e suma cu "schoolbesturen" ta ricibi.

DOW a pasa tur scol na Aruba pa haci "opname" di e tipo di localidad y a entrega un rapport na Minister di Enseñansa y Deporte. Durante e reunion a trata e interpretacion di cada lokaal. Na cada tipo di lokaal tin un suma standard cu e scol tin derecho di haya pa, entre otro limpieza y mantencion etc. Den cuadro di esaki ta bezig cu un proyecto grandi y a reuni pa finalisa detaye pa tur scol a traves di nan directiva di scol por ricibi e aumento desde e aña aki pa cumpli cu tur nan necesidad. ■■■■



2024

AÑA DI STABILIDAD Y PROSPERIDAD



Gabinete Wever-Croes

Arte di Muraya ta un expresion di creatividad sin limite cu ta transforma murayanan di San Nicolas den un galeria bibo cu ta conta historia, transmit emocion y tambe ta stimula e orguyo di un comunidad.

